https://p.ssrq-sds-fds.ch/SSRQ-ZH-NF_I_1_3-139-1

139. Verurteilung des Zürcher Täufers Felix Manz zum Tod durch Ertränken 1527 Januar 5

Regest: Bürgermeister Diethelm Röist, Reichsvogt Matthias Wyss sowie Kleiner und Grosser Rat der Stadt Zürich verurteilen Felix Manz, den Anführer der Täufer, zum Tod durch Ertränken wegen Anstiftung zur Aufruhr und Zusammenrottung gegen die Obrigkeit, das christliche Regiment und die bürgerliche Einigkeit. Das Urteil wird dadurch begründet, dass die Lehre der Täufer durch die Pfarrer und Schriftgelehrten der Stadt widerlegt und durch ein Mandat verboten worden sei. Auch der Verurteilte selbst sei eindringlich aufgefordert worden, davon abzustehen, jedoch habe er nach Freilassung aus dem Gefängnis entgegen seiner geschworenen Urfehde innert zweier Wochen wieder damit angefangen, seine Anhänger zu versammeln, Erwachsene zu taufen, gegen die Rechtmässigkeit der Obrigkeit und deren Strafbefugnis zu predigen und seine Lehre durch die Erzählung angeblicher Visionen zu unterstreichen, wodurch er sich von der christlichen Gemeinde abgesondert habe. Das Vermögen des Täufers wird konfisziert.

Allsdann Felix Mantz¹ von Zurich, der da gegenwürtig statt, unnd ander sin mit verwanten und annhänger wider christennlich ordnung und bruch inn den widertouff begëben und ingelassenn, den selbenn angenomen, ander volk gelert und sunderlich er ein rechter houptsächer und anfänger der dingen gewessen ist, habend unnser herren burgermeister, rat und der groß rat, so mann nëmpt die zweyhundert der stat Zürich, den genanten Mantzen und ander durch ire predicanten unnd der heiligen geschrifft gelerten und verstänndigen mit der rechtenn, götlichen geschrifft, alts und nuws testaments, berichten lassen, das der widertouff nach dem wort gotes nit bestan möge, sonnder verworfen unnd gmeynem christennlichen ordnungen abbrüchig unnd verletzlich, und der kinder touff, so untzhar in gmeyner cristenheit gebrucht^a, gerecht unnd dem wort gotes gemåß sige. Darzů in unnd ander mit allem muglichen fliß und ernst uß warer, götlicher geschrifft und ewangelischer lere von sollicher ir irthůmb und eigenkopfige abzůstand, ouch sich gmeynem cristennlichem bruch zůverglichen, zum höchsten und brüderlich ermanen laßen.

Alls aber etlich inn irem verstopftenn^b fürnemen für unnd für eigenwilennklich beharret unnd sich ouch davon nit wellenn lassen abwißen, habent die gemelten unnser herren nach sollicher ir vilgehepten christennlicher ermanung, als weder güts noch bösses an im gar nüdt hat wellenn helffenn, witer und mer ergernüs und übels, so daher volgen möchte, züverkumen, ernstlich gepot unnd mandaten in ir stat, lannd, gricht unnd gepietenn allennthalbenn laßenn ußgan und offennlich verkündenn, wellicher sich hinfür sollichs widertoufs underzüchen, geprüchen und annhangen, ouch davon leren und nachfolgen würde, das der oder die selbenn personen, es syen frowen oder manen, jung oder alt, on alle gnad ertrenkett werdenn solten.²

Und wie wol vermelter Felix Mantz, wie da eben begriffen wirt, solliches widertoufs ein rechter anfänger und houptsecher und groß unrůw und ubells durch in gestifft ist, jedoch habent gedacht unnser herren in uff ein urfechd uß

ir gefengknůs ledig gelaßen und im darby heiter gesagt, das er hinfür nit mer toufen / [fol. 40v] noch jeman zů dem widertouff einich ursach gebenn, besonnder sich unnserer herren willens flißen und halten sölle, wellicher Felix Mantz deßhalb einen eid, dem nachkommen und zů halten, geschworen.

Aber unangesechen hat er verjechen und ist bekanntlich, das er in vierzechen tagen, nachdem er und die andern sine gebrüderen und anhenger uß der gefennknus geprochen, als er gen Embrach kommen, ein frowen daselbs siner meynung underweißt, gelert und getoufft habe.

Witer ist er anred und verharret daruff, so ver einer oder eins hinfur mer zů im komme und von im gelert und getoufft begerte zů werden, so wellt^de er sollicher person wilfaren und es iro nit abschlachen.

Fürer bekent er sich, gerett habenn, das er und ander, die sich Christy weltind annëmen und dem wort nach volgen, ouch nach Christo wandlen, zů sammen welte sůchen unnd sich mit den selben durch den wideretouff vereynbaren und die andern irs geloubens plibenn laßen, damit nů er und sine anhenger sich von christenlicher gmeynd gesundert und eigen selbs gewachßen sect, reten und versamblungen under einem schin und dekmantell einer christennlichen versamblung und kilchen uff erweken und zů rüsten wellen.

Der egeseit Felix Mantz hat sich ouch bekent und on alle fürwort, sündrung und underscheid, offenlich, wie er gewandlet, ußgeben, ouch für die warheit gelert unnd gehalten, das dhein christ dhein oberer sin noch den anderen mit dem schwert richten noch yemans toden noch strafen solt oder möcht. Und zů einner anzeigung und fürbrechung siner irrigen, verfürten meynung, damit im zů sinem beßen, schantlichenn fürnemen dest fürer und mer volg, gloubenn, anhang und bistand beschechen möchte, hat er witer verjechen, das im einost oder zwůrent etlich sant Pauls episteln im gfenknus, als er gefangen gelegen, / [fol. 41r] unnd sunst, geoffenbaret werint, der gstalt, als ob im die nach der beschribung ougenschinlich zů gegen gesin werint, das er ouch, wie obstat, uß boßheit und ander der gestallt eins gûten hat furbracht und angezeigt.

Unnd diewil dann des vilgeseiten Felix Mantzen meynung und haltung, ouch bruch und lere, des widertoufs und desselben nachvolg, wider das wort gotes und darinn nit gegrünt ist, ouch mit dem selben nit erhalten werden mag, darzů gmeynem, loblichen bruch, der durch alle christenheit untzher eingewillenklich gehalten, gantz widrig, nachteylig unnd verletzlich ist und zů dem, wie offenlich am tag lit, byßher daruß nüdt anders dann mengklich ergernus, emberung und uffrůren wider christenlich oberkeit, zerrütung gemeins^g christennlichs frids, brüderlicher lieb und burgerlicher einigkeit und entlichen alles übels gefolg ist, welliches der egeseit Felix Mantz eigens verstopfs, irrigs willenns und gemüts on berüfft und on ervordert offenlich vor der mënge des volks und sunst heymlichen in winklen, besondern hußern, orten und ënden nit allein gelert und geprediget, sonnders mit der tat getoufft und sich dardurch von gmeyner, christenli-

cher versamblung uber^h alles warnen und veterlich strafen an inn gelegt und beschechen, ouch uber obgemëlte schwëre uß gangne gepot gesundert und, wie obluttet, ein besonndere sect, rott, versamblung und zesammen komung, uⁱnder der gestaltt eins gutenn für und für sy gesücht, ander christenlich personnen und ⁱ einfaltig, arm lüt damit verfürt, von gehorsame irer oberen abgewysen und damit zu nam, todschlag und alles ubels ursach und weg furgenomen unnd so vil an im geweßen ist, gesücht, wie dann der genant Felix Mantz des gichtig und anred, ^k offenlich am tag litt und witer bewyßung nit bedarff.

Umb³ sollich sin, des genanten Felix Mantzen, ufrürig weßen, zesamen rotungen wider ein oberkeit, ouch guten christenlichen regiment und burgerlicher einigkeit, / [fol. 41v] übel unnd myßthun, ist zu im also gricht, das er dem nachrichter befolchen werden, der im sin hånnd binden, in ein schiff setzen, zu dem Nideren Hütly füren und uff dåm hütly die händ gebunden uber die knüw abstreyfen und ein knebel zwüschent den arman und schenklen durhin stoßen unnd in also gebunnden inn das waßer¹ werfen und in dem wasser sterben und verderben laßen. Und er damit dem gricht und recht bußt habenn solle.

Unnd ob yemans, wer der were, der sollichen sinen tod andote oder äfrete, mit worten ald werken, oder das schüfe gethann werden, heimlich oder offennlich, das der und die selben inn den schulden und banden stan und sin sollennt, darinn bemelter Felix Mantz gegenwurtig statt.

m-Was gutt er hat, ist minen herren uf ir gnad heim gefalen.4-m

Actum sambstag vor der heiligen dryger küngen tag anno etc xxvij, vor her Mathis Wyßenn, vogt des richs, und her Diethelm Roisten, burgermeister, ouch reten unnd burgern, ouch uf her Roisten erfondenen brief und sigel erkent.

Eintrag: StAZH B VI 251, fol. 40r-41v; Papier, 21.5 × 32.5 cm. Edition: Egli, Actensammlung, Nr. 1109.

- ^a Korrigiert aus: gebucht.
- b Korrigiert aus: verstopfenn.
- c Streichung: mug und.
- d Korrektur auf Zeilenhöhe, ersetzt: r.
- ^e Hinzufügung oberhalb der Zeile.
- f Korrigiert aus: christenilher.
- Korrigiert aus: gemens.
- h Korrektur überschrieben, ersetzt: d.
- i Korrektur auf Zeilenhöhe, ersetzt: a.
- j Streichung: ander.
- ^k Streichung: ouch.
- 1 Korrektur überschrieben, ersetzt: wer.
- ^m Hinzufügung unterhalb der Zeile.
- ¹ Zu Felix Manz vgl. Stucki 1996, S. 198-200. Eine Beschreibung der Hinrichtung findet sich in Heinrich Bullingers Reformationsgeschichte (Bullinger, Reformationsgeschichte, Bd. 1, S. 381-382). In der Abschrift des Heinrich Thomann wird die Beschreibung durch eine Illustration ergänzt (ZBZ Ms B 316, fol. 284v; für eine Reproduktion vgl. Baumann 2018, S. 116; Leu 2007). Allgemein zum

20

25

30

35

- Zürcher Täufertum vgl. die obrigkeitlichen Mandate der Jahre 1526 und 1613 (SSRQ ZH NF I/1/3, Nr. 130; SSRQ ZH NF I/1/11, Nr. 15).
- ² Dabei handelt es sich um das Mandat vom 6. März 1526 (SSRQ ZH NF I/1/3, Nr. 130).
- Die folgenden beiden Abschnitte entsprechen dem Urteilsformular für die Hinrichtung durch Ertränken, wie es im 2. Teil der Blutgerichtsordnung der Stadt Zürich vorgegeben war (SSRQ ZH NF I/1/3, Nr. 100). Vgl. ebd. für Angaben zum sogenannten Niederen Hüttli oder Fischerhüttli, von wo aus die Ertränkungen vollstreckt wurden.
- ⁴ Für die Klausel betreffend Konfiskation des Vermögens des Verurteilten vgl. die Blutgerichtsordnung der Stadt Zürich (SSRQ ZH NF I/1/3, Nr. 99).